

Ve ca Frico-Man, la version furlane di Pac-Man

Si pues zuiâlu on line sul sît Ghiti.it. E par tv e torne a tacâ la trasmission par fruts "Maman!"

No si fermin lis iniziatis de ARLeF – Agenzie Regionâl pe Lenghe Furlane pai plui piçui. Tacant cun ghiti.it: il portâl in dôs lenghis, inclusîf e acessibil, fat di Ensoul srl e destinât ai fruts dai 3 ai 10 agns, ma ancje ai lôr gjenitôrs. «O vin presentât la plateforme par furlan l'an passât e le vin viodude a cressi tai contignûts, diventant simpri plui siore», al à marcât il president de ARLeF, **Eros Cisilino**, fasint riferiment ai tancj cartons animâts, filmâts, zûcs interatîfs, leturis e altris materiâi educatîfs, che a animin il sît e che a smirin a divertî e a appassionâ lis gjenerazions plui zovinis. Fra lis tantis novitâts, la plui resinte e je Frico-Man, la esclusive version par furlan di Pac-Man, il videozûc originâl dai agns '80. Dopo la presentazion vie pe ultime edizion di Friuli Doc te sô version "cabinade", cumò e je a disposizion online, cussì grançj

e piçui a podaran sfidâsi in partidis divertentis. Ma nol è dut.

I personaçs di Ghiti, midiant di un videofumet, a son rivâts ancje par television. Di Otubar a Jugn, a saran presints te setime edizion di Maman!, la trasmission televisive pe infanzie dute in lenghe furlane, risultât di une coproduzion de ARLeF e di Telefriuli. Di simpri Maman! al propon un formât che al stice il plurilinguism. Par chest e je nassude ancje la rubriche "Zuìn cu lis lenghis", novitât impuartante di cheste edizion che e viôt tornâ protagoniste Daria Miani, la amade condutore de trasmission, e la sô amie Julia, americane di nassite ma furlane di adozion, cui fîs Max e Leo, che a son dal dut



bilengâi e che a son bogns di "switchâ" dal furlan al inglêš cence un fastidi, dimostrant la vere fuarce dal savê fevelâ lenghis diversis!

Prin cors di furlan par gjornaliscj: consegnâts 20 atestâts



Il grup di gjornaliscj, insiem cul Assessôr regionâl Pierpaolo Roberti, cul President dal Consei Regionâl Piero Mauro Zanin, cul President de ARLeF Eros Cisilino e cul President dal ODG F-VJ Cristiano Degano

L'assessôr regionâl cun deleghe aes lenghis minoritariis, **Pierpaolo Roberti**, il president dal Consei regionâl, **Piero Mauro Zanin**, il president de ARLeF, **Eros Cisilino**, e il president dal ODG regionâl, **Cristiano Degano**, a àn consegnât, tai dîs passâts, l'atestât di partecipazion ai vincj gjornaliscj che a àn frequentât il prin cors di lenghe furlane inmaneât di pueste de ARLeF e dal Ordin regionâl dai gjornaliscj. Il percors, di 25 oris, al veve l'obietîf di ufrî une formazion specifiche par scrivi par furlan daûr de grafie uficiâl, ancje zovantsi dai struments informatics a disposizion.

© Foto Petrusi